

二經同卷

雨四

太上十二上品飛天法輪勸戒妙經  
太極真人說二十四門戒經

太上十二上品飛天法輪勸戒妙經

太極真人傳左仙翁

我本師

元始天尊時在大羅蓋天衆寶宮殿自然香  
界道德花臺不捨因心誓度舍生即寂而動

運平等心以方便故啓衆妙門開大慈惠以  
無爲法利濟三世乃以化身名之虛皇虛皇  
之號稱爲道君道君之化周遍十方三千大  
千無極世界一一世界有諸國土一一國土  
現諸化身一一化身放無量光一一光中顯

雨四

諸真像一一真像圓光晃日明耀通天天日  
之表無幽不燭圓明之妙有礙皆通舍生受  
賜動植感恩三途罷對六道昇遷天人盈溢  
地獄空閑觸處清淨法界光明然後收諸光  
明反道合身真儀湛然示啓微妙復彈金指



開發玉音是時鍾鼓自鳴天仙踴躍金爐寶  
栴香煙自薰一切天人及無量衆各增惠力  
同會無爲神開悟解塵慮頓忘入定慧源見  
無極聖同見

無上元始天尊爾時天尊告妙行真人及諸

大衆而作是說今日既善今時亦善汝心亦  
善大衆亦善我故爲汝啓運慈悲將護世間  
少福劣功一切衆生皆可昇進不令退沒故  
我今制無上隄防孚護衆生增進賢善所謂  
九真妙戒智照之光三畛十方歸依信受故

我今說安樂衆生實如所言是時衆會預見  
說者各各定心長跪稽首歸命聖尊普願大  
慈授我尊戒如是勤請經半劫時諸天散香  
衆聖獻寶叩頭三請無退轉心爾時

天尊見是勤請怡然稱善於是慈尊復作是

雨四

二

言一切衆生以愚癡故以貪著故終於長夜  
遂至磨滅我之憂念慈過父母恩重舍容譬  
如孩童墮大深窞其窞幽險多黑毒蛇父母  
聞之生大憂慙先誦神呪禁止毒蛇令子身  
全不遭吞噬以牢縛寶竿及以鈎梯又令力



人入內扶接皆使得出處於坦途諸子愚癡不知畏遠忽有再墮必喪其命父母再告

天尊又出籌策教以神呪降伏毒蛇復遺於寶竿方去危穽唯我今者其法亦然夫無底三途不過深穽諸苦惱毒有極毒蛇一切有情皆是吾子而尊此戒是神文呪能使無明一念消盡是安樂法是勝進方三世聖賢同所崇奉乃至四八天界五億地居帝王后妃太子公主一切宰官初就位時皆應持誦復次一切道心出家在家四輩男女若貴若賤

若山若世一切有情無位異類等人欲受戒  
時先須清淨發弘誓願往詣師門行道禮念  
若無師可授要得諸善應當於三寶座前而  
授誦之云何名為得見善應若於行道禮念  
之處目洞神光明照如日初小後大三界煥

雨四

三

然天地山河無有障礙乃至一切無量妙因  
是謂光明清淨戒相若不爾者非得戒因若  
遇大善師是名宿緣慶會不須別見相也今  
告爾等得遇戒因浩劫難逢此時際會汝發  
志心齊起善念爾時



天尊而說偈頌

我以平等心

說是真妙戒

欲令一切衆

安樂坐道場

天龍魔鬼神

夜叉非人等

上首能言者

普得於受持

當知得戒人

即入真聖品

若天若凡聖

咸應恭敬心

月朔月望時

昇諸獅子座

端心調正氣

和順說是戒

凡有聞法音

各各默然聽

諸有不自誦

由信入福堂

我故今善時

為汝宣妙戒

汝等得戒已

復當流布聞

凡欲受戒時

及讀若持誦

先當皈三寶

次後宣戒文

如法持誦人

見世七種福

汝等當善信

無生疑惑心

一者短命人

應時得增壽

二者愚昧性

咸開廣大心

三者卑賤形

漸易尊貴相

四者諸貧乏

不久成富饒

五者醜陋容

增益諸端正

六者內外病

日向得除愈

七者惱害緣

尋獲大安康

當知受戒者

其福德若斯

未來勝善因

億載無窮已

昇陟三九位

得成無上道

隨心滿願天尊



天尊說是偈已普告四衆欲聞大道法音真人戒者內外端正三業清淨諦聽諦受如法受持凡受持戒者歸依三寶同誠稱善無生異念

歸依道經師三寶

雨四

四

天尊言弟子受真戒者不得屠業爲殺及以自殺教他殺方便殺隨喜殺乃至因緣殺不得已殺報殺悞殺如是種殺皆不可爲之愍念有情如已身命殺害之人六種罪報一者見世輒軻常值惡報二者與一切衆生常爲

怨讎三者鬼神賊害招集凶禍四者正報死  
墮地獄劒樹刀山受諸苦惱無時暫息五者  
雜報禽獸畜生迤相啖食六者縱得人身復  
遭刑戮是大惡業非真人行

殺生惡業罪消滅

天尊言弟子受真戒者不得偷盜及取非義  
財乃至道路遺失風吹禽嚙野間拾得皆不  
可受或復殺人威勢取與方便歡喜引誘他  
物毫分鎰銖皆不得爲盜偷之人五種罪報  
一者乞托庸身貧窮下賤二者經營不遂百



物虛耗水火蟲傷三者常遭口舌財寶散亡  
四者正報普掠地獄痛毒難伸五者餘報牛  
馬畜生是大惡業非真人行

偷盜惡業罪消滅

天尊言弟子受真戒者不得邪淫苟合男女

雨四

五

入於濁亂染污出家侵凌貞潔不別老幼豈  
論親疎寧揀醜妍那分兄弟如是等緣皆不  
可爲邪淫之人七種罪報一者生死根本二  
者穢惱之源三者廢修善行四者短命因緣  
弊失龜爽五者寤寐顛倒識性荒迷六者死

墮地獄鐵床銅柱身焦骨爛出沒寒池水戟  
霜刃死而復生轉輪無息受大苦惱七者雜  
報猪狗不淨禽獸等身是大惡業非真人行

淫邪惡業罪消滅

天尊言弟子受真戒者不得妄語誹謗訾毀  
三寶帝王師尊乃至出家在家持法破法無  
問凡聖皆應恭敬如法奉承或復異相法門  
殊教同善可隨順者無起是非誹謗之人六  
種罪報一者見世惡疾所加二者未來幽暗  
無曉三者百劫雜報作無目等蟲四者雖處



人中常無舌根五者常滯怨憎無人愛敬六者生生世世與善無緣言說不信人所不親是大惡業非真人行

毀謗惡業罪消滅

天尊言弟子受真戒者不得兩舌惡罵非分

毒語傷損有情合造是非兩邊作語乃至鬼神及以凡夫不喜聞見何況聖賢之所聞也惡口之人六種罪報一者見世常遭凌辱二者死墮地獄拔舌犁耕三者爲人瘖啞四者人所憎害五者凡百所向常不稱心六者受

報猪狗蜂蝎毒蟲之類乃至兩頭之蛇九首之鳥是六惡業非真人行

惡口兩舌罪消滅

天尊言弟子受真戒者不得嫉妬勝已抑絕賢明自無道德強生謗毀遂起惡心方便中

雨四

六

傷令其破壞起此心者已損福田何望到頭成就善果嫉妬之人五種罪報一者永不見三寶聖賢二者斷諸善緣兇惡纏繞三者正報愚癡聾盲四者多涉險難自取滅亡五者惡緣惱害無時解脫是大惡業非真人行



嫉妬惡業罪消滅

天尊言弟子受真戒者不得慳貪損他利己  
若見衆生心無止足方便曉諭少欲爲心貪  
愛之緣如飲鹹水亦如漏器不可盈滿慳貪  
之人四種罪報一者令人見世多得多失二  
者過後卑賤饑寒三者餓鬼之身吞火食炭  
四者當墮豺狼禽蟲畜生等報是大惡業非  
真人行

慳貪惡業罪消滅

天尊言弟子受真戒者不得縱恣瞋怒惡口

毒語兇暴酷虐嗔怒之人四種罪報一者耗  
費神氣勢毒所傷二者有情不喜見聞三者  
死作鴟鵂蜂蛇惡獸之類四者縱生人道卑  
賤愚下是物所輕常無威勢是人惡業非真  
人行

雨四

七

嗔怒惡業罪消滅

天尊言弟子受真戒者不得縱恣庸愚自用  
悖戾欺罔賢善教誨無改愚戾之人四種罪  
報一者神明不祐二者斷絕善根三者失正  
入邪四者鬼魅纏繞是大惡業非真人行



庸愚惡業罪消滅

天尊言弟子受真戒者不得叛背國王心不忠正興兵動衆傷害無辜不忠之人六種罪報一者自身被苦二者破累家族三者歿後常處三塗累劫無出四者報得毒蛇惡獸等身五者雖還人中餘報殘戮六者常生惡處無自在身是大惡業非真人行

不忠惡業罪消滅

天尊言弟子受真戒者不得無孝順心違逆父母不生敬愛踈背宗親不念慈恩不生慚

愧不孝之人六種罪報一者王法所加二者  
有情同所棄薄三者當墮地獄十苦加身四  
者鴟梟等形迺相殘害五者縱生人道不孝  
因緣以爲男女更相惱害六者縱橫所加天  
雷殛斬是大惡業非真人行

不孝惡業罪消滅

天尊言弟子受真戒者不得飲酒食肉及勸  
人飲酒食肉飲酒之人有三種罪報一者見  
世妨失善法乃至未來神識暗鈍二者顛狂  
昏亂無決照心兼墮蠕蛤徃徃等身三者縱



得人身識性荒迷惡癡等報食肉之人有二  
種罪報一者善法不行斷慈悲種所在常與  
衆生報酬爲冤二者眷屬離散多悲少歡死  
墮餓鬼地獄豺狼等身是大惡業非真人行

### 飲酒食肉罪消滅

雨四

八

天尊曰已上十二種大惡業速宜退省勤行  
懺悔若不懺悔身謝之後風刀考身長淪惡  
趣生生世世與道無緣有識無情不喜聞見  
何況真智身心自爲忍辱

天尊說是戒已復唱是言弟子受真戒次當

發弘願使得戒根牢固如玄都山戒相端嚴  
如玉京殿戒德光明如琉璃珠天人同唱而  
說偈曰

稽首三界主 歸命萬道尊 願垂真妙戒  
開度於天人 能發片善心 精誠心不退

威力常加護 同歸七寶林

太上十二上品飛天法輪勸戒妙經終